

**THE MAGIC PIZZA**  
by Ali Christie

Eh'm a pizza, a magic pizza,  
Bein stuck in the freezer's a scunner -  
So Eh grew twa legs an oor ago  
An fae Tesco Eh did a runner.

Eh'm a pizza, a gaun-ma-dinger pizza,  
Eh'm skitin doon the street,  
An giein a muckle cheesy grin  
Tae the dumfoonert fowk Eh meet.

Eh'm a pizza, a please-mehsel pizza,  
Eh can dae whitiver Eh like -  
Fleh wi cheese and tomatae wings  
Or gae dancin doon a dyke.

Eh'm a pizza, an oan-the-rin pizza,  
The polis are efter me -  
But they needna think that ony o them  
Are haein me fur thir tea.

Eh'm a pizza, a thumb-yir-neb pizza,  
Eh'll tell them tae git loast.  
Oh jings - Eh'm a puggilt pizza noo -  
Eh've stertit tae defroast!